

為國郡中長吏亡足與謀者故召公告之即被佗書行

南海尉事師古曰被加也音皮義反囂死佗即移檄告橫浦陽山湟

谿關師古曰湟音皇曰盜兵且至急絕道聚兵自守因稍以法

誅秦所置吏以其黨為守假師古曰令為郡縣之職或守或假也秦已滅

佗即擊并桂林象郡自立為南粵武王高帝已定天下

為中國勞苦故釋佗不誅師古曰釋置也十一年遣陸賈立佗

為南粵王與剖符通使使和輯百粵師古曰輯與集同毋為南

邊害與長沙接境高后時有司請禁粵關市鐵器佗曰

高皇帝立我通使物今高后聽讒臣別異蠻夷鬲絕器

物師古曰鬲與隔同此必長沙王計欲倚中國師古曰倚音於綺反擊滅